

Өшпестей өмірің бар, Гайдар аға...

Қайыңды деген кішкентай ғана ауылдың атын шығарып, туған жердің мерейін өсіріп жүрген танымал да, талантты ел перзенттерінің есімін мақтанышпен атаудың өзі адамның абыройын асқақтататыны анық.

Қолыма қалам алып, білгендерге аз ғұмыр сүрсе де өмірінде елеулі еңбектерге жеткен, алар асуы алда болса да жарқ етіп өшкен жұлдыздай болған, арманы көп, айбынды да асыл азамат Қайыңды ауылының төл перзенті Қазақстанның зіл көтеруден алты дүркін чемпионы, КСРО спорт шебері Гайдар Саржанов туралы азырақ сыр шертсем деп едім. Ауылдың ақулы перзенті биыл тірі болса 60 жасқа толар еді. Ал, Қайыңды ауылының іргетасы қаланғанына 2017 жылғы 60 жыл болады. Ауулы ағаның жеткен жетістіктері ұрпақ еңбегінде, ел тарихында жазылмағаны жүректі ауыртады екен. Кезінде сол кісінің қасында жүрген достары бүгінде көздері тірі болса, замандастары ауылдың асыл перзенті туралы неге айтпайды, ел тарихына неге енгізбейді деген сұрақ санамды мазалайды. Кіндік қаны тамған қазір әр салада қызмет атқарып жатқан Қайыңды ауылының төл перзенттері елу жылдығын да еске алмады, енді алпыс жылдығында туған жерге табан тигізіп, топырағына тағзым етіп, орталарында жоқ осын-

дай асыл азаматтарға қол жабып, дұға арнайтын шығар деген ой да үміт шоғындай жылтырайды.

Гайдар Саржанов 1956 жылы Арқалық қаласына қарасты Қайыңды ауылында туған. Батиха әжейдің бауырында өскен Гайдар бала жаста мектеп қабырғасында жүргенде-ақ топ жарады. Мектепті тәмамдаған соң Алматының дене шынықтыру институтында оқып, білім алады. Бірінші курста оқып жүріп, спорт шеберінің нормативін (шарты) орындады. Алты жыл ауыр атлетілерінің 75 келілік салмақтағы спортшысы болды. Гайдар Саржановтың спорттағы жеткен жетістіктерін атап айтсам: 1973 жылы 9-шы сыныпта оқып жүргенде 95 кг серпу мен 12 кг жұлқуда «Спартак» қоғамының біріншілігінде 1 орынды жеңіп алды. 1974 жылдары Павлодар қаласында спорттық шеберлікті жетілдірудің жоғары мектептері арасындағы біріншілікте 110 кг серпу мен 140 кг жұлқуда жүлделі орын, Степногорскте Қазақстан Республикасының біріншілігінде 3 орынды, Қарағанды қаласында одақтық студенттер ойынында 75 кг салмақта 1 орынды, Шымкент қаласында Қазақстанның жастар арасындағы чемпионатында серпуден 133,5 кг салмақ көтеріп, өзіне дейін сегіз жыл тұрған Қазақстанның ересектер арасындағы рекордын жаңартты. Ал, 1977 жылдары Шымкентте жастардың студенттік ойындарының бағдар-

ламасы бойынша 1 орын, Минскіде бүкілодақтық жастар ойынында 1 орын, «Спартак» орталық қоғамының біріншілігінде 1 орын, Новополюск қаласында, Витебск облысы «Спартак» қоғамы бойынша жартылай орта салмақтағы чемпионы, Түркияда Стамбул қаласында халықаралық жарыста 2 орын, Гавана Кубада халықаралық жарыста 3 орынды жеңіп алды. Тағы да 1975 жылы Магнитогорск қаласында өткізілген бүкілодақтық студенттер ойынында КСРО спорт шеберлігінің нормативін орындады. 1978 жылдары Батыс Германия, Мюнхен қаласында халықаралық жарыста 1 орын, Моңғол халық республикасының астанасы Улан-Баторда 1 орынды қанжығасына байлады.

Ал, Болгарияда 3 орын, Польшада А. Чеховскийден кейін 2 орынды иеленді. 1976 жылы КСРО-ның жастар арасындағы біріншілігінде Гайдар Н. Варданян сияқты олимпиаданың болашақ чемпиондарын артқа тастап, бірінші орынға шықты.

Шымкент қаласында 140,5 серпе көтеріп, тағы да Қазақстан рекордын жаңартты. Вильнюс қаласында өткен жастар арасындағы одақтық біріншілікте 1 орыннан көрінді.

Осындай жетістіктерге жеткен Гайдар Саржановтың спортта қалдырған ізін қалай айтпаққа?! Алты рет Қазақстанның чемпионы



болған, 90 рет тұтырға көтерілген асыл азаматымызды құрметпен қадірлесек, несі айып?! Аз ғана ғұмыр кешсе де, білгендерге өшпестей өмірі бар Гайдар Саржанов ағамыз тірі болса, алтын той – алпыс жасқа толар еді.

Өмірге келген әрбір саналы ұрпақ осындай аяулы азаматын біліп, мақтан тұтып, жолын қуса құба-құп. Елі ардақтап, еске алып, іс-шаралар ұйымдастырса, бұл асыл азаматқа көрсеткен ілтипатымыз болар еді.

Қайыңды елі топырағынан нәр алған сіздей ардақты, асыл перзентін мақтан тұтып, рухыңызға тағзым етеді.

Мерей ҚУАНЫШҚЫЗЫ